

ARAHAN: Baca petikan berikut dan jawab soalan pemahaman yang diberikan.



Menulis

Pejuang Bahasa

Peserta Karnival Bahasa Melayu berkumpul di bilik tayangan. Mereka menonton video berjudul "Datuk Dr. Haji Awang bin Sariyan, Pejuang Bahasa".

Pada 20 Oktober 1953, lahirlah seorang anak lelaki yang dinamai Awang. Beliau dilahirkan di Kampung Parti Bilal, Rambah, Pontian, Johor dan dibesarkan di Kampung Teluk Kerang, Pontian, Johor.

Datuk Dr. Haji Awang bin Sariyan memperoleh ijazah Sarjana Muda Persuratan daripada Universiti Kebangsaan Malaysia pada tahun 1977, Ijazah Sarjana Sastera dalam bidang linguistik daripada Universiti Malaya pada tahun 1984 dan ijazah Doktor Falsafah dalam bidang falsafah pendidikan bahasa daripada universiti yang sama.

Datuk Dr. Haji Awang Sariyan telah dilantik sebagai Ketua Pengarah Dewan Bahasa dan Pustaka (DBP) pada 1 Februari 2012. Sebelum itu, beliau pernah menjadi Pengarah Jabatan Bahasa di DBP. Seterusnya, beliau merantau ke luar negara demi memartabatkan bahasa Melayu. Datuk Dr. Haji Awang Sariyan dilantik sebagai penyandang pertama Kursi Pengajian Melayu Malaysia di Republik Rakyat China, yang berpangkalan di Universiti Pengajian Asing Beijing. Beliau bertugas di sana dari tahun 2008 hingga 2011.

Beliau juga pernah menyandang jawatan Profesor Bahasa di Fakulti Bahasa Moden dan Komunikasi di Universiti Putra Malaysia dan Profesor Bahasa di Akademi Pengajian Melayu di Universiti Malaya. Selain itu, beliau pernah menjadi tenaga akademik di Universiti Islam Antarabangsa Malaysia, Universiti Brunei Darussalam dan Universiti Pendidikan Sultan Idris. Beliau juga diundang menjadi Profesor Tamu di Universiti Frankfurt, Jerman dan di Universiti Sumatera Utara, Indonesia.

Beliau telah mengarang banyak buku dan rencana tentang bahasa Melayu. Antara bukunya yang popular termasuklah *Santun Berbahasa*, *Falsafah dan Logika Melayu* dan *Tertib Mengarang*.

Kini, buku-buku hasil penulisan Datuk Dr. Haji Awang bin Sariyan menjadi rujukan para ilmuwan bahasa di seantero dunia.

1. Siapakah tokoh yang memperjuangkan bahasa Melayu?
Tokoh yang memperjuangkan bahasa Melayu ialah _____
2. Di manakah beliau dibesarkan?
Beliau dibesarkan di _____
3. Nyatakan ijazah yang diterima oleh beliau pada tahun 1977.
Ijazah yang diterima oleh beliau pada tahun 1977 ialah _____
4. Bilakah beliau dilantik sebagai Ketua Pengarah Dewan Bahasa dan Pustaka?
Beliau dilantik sebagai Ketua Pengarah Dewan Bahasa dan Pustaka pada _____

ARAHAN: Imlak perkataan berikut dan padankan maknanya yang sesuai di bawah.

falsafah

seantero

fakulti

pengajian

kursi pengajian

penyandang

ilmuwan

profesor

linguistik

memartabatkan

1. Jawatan professor di universiti
2. Seluruh dunia
3. Pengetahuan tentang sesuatu ilmu yang menjadi dasar ilmu lain
4. Usaha atau kegiatan belajar
5. Sesuatu cabang atau jurusan pengajian
6. Golongan akademik / orang yang berilmu
7. Orang yang memegang sesuatu jawatan
8. Kajian saintifik tentang bahasa
9. Orang akademik yang tinggi taraf jawatan
10. Menjadikan sesuatu bermartabat

***** SEKIAN *****

SEMOGA ANDA BERJAYA MENJAWAB TUGASAN INI DENGAN CEMERLANG. TERIMA KASIH.